

## **Kadasi n bo YAKOBO akerε i ni**

<sup>1</sup> Mini Yakobo bo m ti Nyεmε ni ya Mibiε Yesu Kristo dεε akoo ni, m bisa Kristo jamam n kerε dɔŋgu, berε bo ba sandi abara aye durunya n kerε nu ni.

### *Yaradayo ni alecira jɔrε*

<sup>2</sup> M ninbaam, nzen gberegberε be tu am, am ma am ahore jɔ. <sup>3</sup> Dama am si ka am yarada bo am ayo Nyεmε n dεε ti, ye nyini gberegberε n tu am a, na am mindi ŋuuri i awieeri, am koro mindi ŋu gberegberem bo bu tara nyini n mmoo awieeri. <sup>4</sup> Am ma am mindi n sun am nu, adena am woowa kerε ti kabo Nyεmε koro ka i ti ni na má pui kpiε am su.

<sup>5</sup> Ama, nzen alecira akpiε am nu be su, i ti ye ni ka i mi sere i Nyεmε dɔ, yiri bo i ce sɔnɔ kerε aceeri ni i kunnu kun ni, na i wura má be nyinse ka i mi asere i n dεε ti. Nyini ti, nzen be sere Nyεmε, yiri má i mi alecira n a. <sup>6</sup> Ama, nzen be sere Nyεmε, i ti ye ni ka i mi yo yarada ka deke bo i sere i ni, Nyεmε má i wɔ, na má i mi yo sika, dama sɔnɔ kerε bo i yo sika, i ti ka nzue bo aŋuma bo i kɔ i sin ba i nyunu wɔ. <sup>7-8</sup> Nyini sɔnɔ n bo i yo sika sɔ ni, i sunsunni ti nnyɔ nnyɔ ɔ, fa kɔ Nyεmε dɔ, i si má i jinaabiri. Má i mi n sunsun ka i nya pui fite Mibiε n dɔ.

*Fotu fa kɔ Kristo jama n yaarifɔm ni nenɛgefɔm do*

<sup>9</sup> Tɔ, ya niwa bo i ti yaarifɔ, na Nyemɛ awura i kpiri, i ti ye ni ka i mi ma i ahore da. <sup>10</sup> Na ya niwa bo i ti nenɛgefɔ gusu, na Nyemɛ ayo i kaan, i ti ye ni ka i mi ma i ahore da. Dama i cɛ má na i ni i nenɛge n kɛrɛ bá wo má bɛrɛ, kabo wura pum cɛ má, na i ni i nyumi n kɛrɛ kpɔnkpɔn barasu ni. <sup>11</sup> I ti sɔ ɔ, kabo wiɛ ba bi, na i kɛkɛrɛ n bo kpɔnkpɔn wura pum na i wu, na i nyumi wie ni. Kabo nenɛgefɔ n gusu ni i nenɛge n ti lɛɛ. Sanga bo i nyunu aba aboro i juma su ni, i ni i nenɛge n kɛrɛ bá wo má bɛrɛ kun.

*Fotu fa kɔ sanga bo am wo gbɛrɛgbɛrɛ nu ni*

<sup>12</sup> Terefiɛ wo sɔnɔ kɛrɛ bo gbɛrɛgbɛrɛ tu i, na i mi saaki má i nɔɔ n do. Nyini sɔnɔ n koro mindi nyuri nyini gbɛrɛgbɛrɛ n awieeri, i nyá ngɔɔ Nyemɛ do, nyini la aceeri n bo i yo seeri ka i fá ma bɛrɛ bo bu koro i ni. <sup>13</sup> Nzen gbɛrɛgbɛrɛ n sɔ n atu be na i ma i wura satie nu, má i mi se ka, “Nyemɛ ayo m ye m wura satie nu a.” Dama pui koro yo má Nyemɛ na i wura satie nu, na i gusu yo má be na i mi wura satie nu. <sup>14</sup> Ama, deke bo i ma sɔnɔ wura satie nu n la i mi ni i tii dɛɛ konvikiya a, nyini ma i cin dodo satieyo a, <sup>15</sup> na nyini konvikiya n nya cin i wura satie nu na i mi yo satie be, na nyini satieyo n nya ba bi wieeri, i fa yiwee ba a.

<sup>16</sup> M ninbaa koroowam, má am daka am nyu.

<sup>17</sup> Aceeri kɛrɛ bo i ti kpa na i ti kabo Nyemɛ koro ka i ti ni, i kɛrɛ fite angoro ya Si Nyemɛ do ɔ, yiri yiiri deke n kɛrɛ bo i ta angoro n a. I wo ti i wo wɔ, na i ma má awosin yo má na i kaaki deke

be. <sup>18</sup> I dɛɛ koroyanu, na wɔ fa i nɔaniɛ n bo i ti nahɔrɛ n ama ya, ye ya yo i nbaam. I yoori sɔ ɔ, adena ya yo deke n kɛrɛ bo wɔ yi bu n tii.

*Am de Nyemɛ nɔaniɛ n na am yo kabo i kere ni*

<sup>19</sup> M ninbaa koroowam, i ti ye ni ka am ti ahin sereya n bu, ka, sɔnɔ kɛrɛ so i sui ndende na i ti, má i mi koro nde jɔjɔ, má i kaaki fa yaa ndende. <sup>20</sup> Dama yaa kere má sɔnɔ na i yo sa bo i kɔ atin su Nyemɛ dɔ. <sup>21</sup> Nyini ti, am yaki sa ngbɛɛn-ngbɛɛn, ni satie kɛrɛ yo. Am yo am ηu kaan fa ma Nyemɛ, na am de i nɔaniɛ n bo wɔ fa awura am ahorembaa su ni. Dama nyini nɔaniɛ ni koro de am tii ji a.

<sup>22</sup> Am yo kabo Nyemɛ nɔaniɛ n kere ni. Má am dadaka am ηu ka am ati i na am yo má kabo i kere ni. <sup>23</sup> Dama nzen be tiiri nɔaniɛ n na i yo má kabo i kere ni, i mi ti ka sɔnɔ bo i fa niɛnu niɛ, na i ηu i ηu wɔ, <sup>24</sup> ama, na i nya faari niɛnu n seeri, na i kɔ wieeri, a ηu ka i wara afi kabo i nyunuawa ti barasu. <sup>25</sup> Ama, sɔnɔ kɛrɛ gusu bo i fiitiiri Nyemɛ nɔaniɛ kpamaawa n nu, nɔaniɛ kpamaawa n bo i ti kabo Nyemɛ koro ka i ti n na i ma minɛm nyaari bu tii ni, na nzen i mi boro i nyi su nɔaniɛ n su, na i mi ti má sɔnɔ bo i ti nɔaniɛ n na i wara afi i, ama, na i ti sɔnɔ bo i yo kabo nɔaniɛ n kere ka i yo ni, i mi yiri, Nyemɛ yó i kisi fa kɔ i sayoowa kɛrɛ nu.

<sup>26</sup> Sasu bekun, sɔnɔ kɛrɛ bo i ηa i su Nyemɛ atin su, na i koro tara má i nɔɔ, i mi daka i ηu wɔ lɛɛ, na i nyemesu atin n ti ngbɛɛn wɔ.

<sup>27</sup> Nyemesu atin bo be su i su n na i la má gela

be ya Si Nyeme dɔ n la ahin, ka, i mi nie ayikam ni nkunafom su, bere bo bu di yaari ni, na i mi kaaki tara i ɲu na má durunya n nufom ma i yo fin be Nyeme dɔ ɔ.

## 2

### *Fotu fa kɔ tantambunu*

<sup>1</sup> M ninbaam, kabo am yo Yesu Kristo yarada ni, yiri bo i ti ya Mibiɛ Jirimafɔ ni, má am fa tantambunu ni am beɲgu. <sup>2</sup> Ma m fa i ka, nzen mine nnyɔ nbem ba wuraari am tientienbunɔɔ sɔɔ n nu, na kun wura sutura kpakpa ni sika ɲгаа, na nyiɲga n ti yaarifɔ na i wura sutura titiiwa, <sup>3</sup> na nzen am nu kun se bo i wura sutura kpakpa n ka, “Jande, ba tana ahin tanaabiri nyunyumi n su,” na i nya se yaarifɔ n ka, “Wɔɔɔ, ka jina dɔ, nzen má nyini, ba tana m jaa bu fen,” <sup>4</sup> nyini kere ka am sufa tantambunu atin lee, na am sunsunni tie ma am sufa kpakpaakinu ba lee, má sɔ?

<sup>5</sup> M ninbaa koroowam, am ti fen. Má Nyeme yiiri yaarifom bo bu wo durunya n nu n ka bu ti ajekefom i dɔ, bu yarada n deɛ ti a, na bu nyá femeya n bo wɔ se ka i fa ma minem bo bu koro i n a, nzen se? <sup>6</sup> Ama, ambere bu yaarifom ɲgbeen wɔ. Nmam kere am wahara n a? Nmam kaaki cin am kɔ jɔɛ diibirin n a? Má neɲgefom n a? <sup>7</sup> Má bere jojo wura duma n bo i la anyunuyi ni ɲgasi nu n a? Yiri ye Nyeme afa ama am na i kere ka am ti i deɛm ni.

<sup>8</sup> Ba kere i Nyeme Jɔɛ Kadasi n nu ka, “Koro u beɲgu kabo a koro u ɲu ni.” Nyeme femeya n nu nɔaniɛ kpamaawa bambaka n lee.

Nzen am yo sɔ, nyini ti kpa a. <sup>9</sup> Ama, nzen am laari tantambunu, am ayo satie, na Nyeme nɔanie kpamaawa n kere ka am ti ketemafɔm wɔ lɛɛ. <sup>10</sup> Wɔrɔ kere bo a suuri Nyeme nɔanie kpamaawa n kere su, ama, na a saakiiri i kun n kpein mmɔɔ, a saaki nɔanie kpamaawa n kere lɛɛ. <sup>11</sup> Nyeme bo wɔ se ka, “Má a kpini u beɲgu yi” ni, yiri akaaki ase ka, “Má a kun sɔnɔ” n a. Ama, nzen haari a kpini má u beɲgu yi, ye a kuunri sɔnɔ, a yo ketemafɔ fa kɔ nɔanie kpamaawa n su lɛɛ. <sup>12</sup> Am ma am jɔjɔɔwa ni am sayoowa kere ka am ti minem bo Nyeme bá fa i nɔanie kpamaawa ni fá di am jɔre a, nyini nɔanie kpamaawa n bo i ma minem nya bu tii ni. <sup>13</sup> Dama jɔredi cɛen, minem bo bu si má bu beɲgum aɲunfɔ ni, Nyeme si má bere mmɔɔ aɲunfɔ. Ama, aɲunfɔ sifɔm ni, bere dí nasara, jɔredi cɛen ni.

### *Fɔtu fa kɔ yarada ni i sayoowa*

<sup>14</sup> M ninbaam, nzen sɔnɔ ɲa i yo Nyeme yarada, na i sayoowa kere má ka i la yarada, nyini yarada ni kóro de i tii ji, nzen se? Ai, nyini ti ɲgbɛen wɔ lɛɛ. <sup>15</sup> Ma m fa i ka, nzen am ninbaa Kristo jama nbem wo bere bo bu la má diire, na bu la má sutura, <sup>16</sup> na nzen am nu kun seeri i ka, “Kɔ ni ahoreda. Nyeme ma u na a di, na i ma a nya sutura.” Nzen a seeri sɔ, na a ma má i mi koroowa ni, i kpa la bɔnɔ? <sup>17</sup> Nyini ti, nzen a la yarada n ɲgumi, na u sayoowa kere má ka a la yarada, i ti yarada ɲgbɛen wɔ lɛɛ.

<sup>18</sup> Be koro se ka, “Ahin sɔnɔ n yiri yo Nyeme yarada wɔ, ama, ahin n yiri yo sakpa a.” Tɔ, ye

sono yo se kere ka i yo Nyeme yarada, bo i yo ma sakpa a? Mini yo sakpa a, nyini kere ka m yo Nyeme yarada. <sup>19</sup> A na a yo yarada ka Nyeme ngumi wo bere a. Nfan. Haari ajinim mmoo si i so o, na bu nuni subobo bu ni se. <sup>20</sup> Woro sinnzin ngbeen ni, a koro ka m kere u ka yarada yoowa bo i kere ma sakpa n ti yarada ngbeen wo, nzen se? <sup>21</sup> I yo se ye Nyeme deeri ya na Abraham ka i yo sa bo i ko atin su i do a? Abraham sayoowa n de ti ye Nyeme deeri i so a, dama Abraham yo faari i wa Izaki fa seeri Mikun n yoowa yobiri n ka i fa i yo yoowa ma Nyeme ni. <sup>22</sup> A nu ma i? I yarada yoowa fa sangani i sakpa yoowa kere yoori kun wo. Na i sayoowa n akere ka i yarada n ti kabo Nyeme koro ka i ti n wo. <sup>23</sup> So ye deke n bo bu kereri i Nyeme Jore Kadasi n nu n ayo yiiwa a, ka, "Abraham yoori Nyeme yarada n de ti, na Nyeme ade i ka i yo sa bo i ko atin su i do." Nyini ti, ye bu fereeri i ka Nyeme danfo n a. <sup>24</sup> To, m na am anu i e, ka sono sayoowa ma Nyeme de i ka i yo sa bo i ko atin su i do a, ma ka i mi yarada ngumi ti. <sup>25</sup> I ti so o lee, fa ko bara sakara be bo bu fere i ka Rahabu n do. Dama dawa sangani, yiri yo bukaari Yisarelifom de ke resiyifom n a, na wo kere bu atin na ba foro bu kprofom saa nu. Nyini sayoowa n de ti, na Nyeme ade i ka i yo sa bo i ko atin su i do o. <sup>26</sup> To, kabo nuni awo ma anuniembaa n nu na i ti fuin ni, so ye i ti a, nzen a la yarada na u sayoowa kere ma ka a la yarada, yarada ngbeen lee.

### 3

#### *Fɔtu fa kɔ kabo ya bita ya taferema*

<sup>1</sup> M ninbaam, má am dɔŋgu yo am ŋu kerefɔm. Dama am si ka yere bo ya ti kerefɔm ni, ya jɔre diiwa bá yo kekereke agaya a. <sup>2</sup> Ya kere ba yo, ya yo sam bo bu kɔ má atin su wɔ. Ama, nzen sɔnɔ kere bo i jɔjɔwa kere kɔ atin su, i mi woowa n ayo kabo Nyeme koro ka i yo n wɔ lɛɛ. I kere ka i mi n la tarabuŋu sa kere nu lɛɛ. <sup>3</sup> Am ma ya nie kpɔŋɔ. Ya fa karafi wura kpɔŋɔm nɔɔ ɔ, na ya kunma bu fanɔa na bu yo deke kere bo ya koro ka bu yo i ni. <sup>4</sup> Am ma ya nie lee bambaka gusu, i ni i bambaka n kere ni, haari nzen aɔuma bambaka subo i kɔ deke be, lee kanfɔ n koro fa napɔku baka n bo i ti kaan ni lee ni, na i kan i kɔ deke kere bo i koro. <sup>5</sup> I ti sɔ lɛɛ ni taferema n gusu, i ni bo i ti kaan aɔuniembaa n nu n kere ni, i koro saaki deke dɔŋgu.

Nie kabo sin ti barasu a, haari i ti kaan se, i koro je boo bambaka. <sup>6</sup> Taferema n ti ka sin wɔ lɛɛ. Bekun, ya ŋuniembaa n nu, i kaaki ti ka satiem bo ba yi durunya n nu n wɔ, i satie n sa aɔuniembaa n kere wɔ. I yo juma ka sin wɔ, na i saaki sɔnɔ ŋuniembaa n fite cɛɛn n bo bu wuuri i n fa kɔ ju haari i yiwee cɛɛn. Yiko bo taferema n la i na i yo sɔ n fite cɛɛma sin n nu wɔ. <sup>7</sup> Adamande kunma deke n kere fanɔa, i ajaannam o, i lanɔkpetefɔm o, i cinbukunnusufɔm o, ni jombaam o. Na wɔ koro ata bu kere. <sup>8</sup> Ama, taferema yiri, sɔnɔ be nya koro kunma má i fanɔa. I ti deke tie wɔ, bo be koro tara má i. I ti ka wɔ yi ni bɔre bo i

kun wɔ. <sup>9</sup> Ya fa yiri fa kansi Micera n bo i ti ya Si n a. Na ya kaaki fa yiri saaki minem bo Nyeme ayi bu ka bu ferema ni yiri n a. <sup>10</sup> Nyini anɔɔ kun n ye kansi ni saaki fite nu a. M ninbaam, wɔ yo má daka ka i ti sɔ. <sup>11</sup> Bura kun koro tie nzue kpa, ni nzue tie, nzen se? Ai, i koro yo má. <sup>12</sup> M ninbaam, am si ka damba baka koro su má nguimbbaa. Cumi baka gusu koro su má damba. I ti sɔ ɔ lɛɛ, bura bo i nzue ti lalaraki, i koro tie má nzue bo i yo fie.

*Fɔtu fa kɔ alecira bo i fite Nyeme dɔ ni*

<sup>13</sup> Nma wo am nu bo i la alecira ni si a? I ti ye ni ka i mi kere ka i ti sɔ ɔ, fa kɔ i woowa kpa su, na i yo sakpa, na i wo benle, nyini kere ka i la alecira. <sup>14</sup> Ama, nzen am susi kɔre ahorembaa su, na am suyo wi, na am bita anyii sunsunni, má am bita fɔ ka am la alecira, na má am bu kɔre jarakɔ nahɔre n sɔ. <sup>15</sup> Nyini alecira n sɔ fite má Nyeme dɔ, ama, i fite durunya n nu fen wɔ, i nati má Nyeme atin su, i ti Sitana dɛɛ wɔ. <sup>16</sup> Deke bo kɔresi, ni anyii wo, kpakpaakinu ni satie yoowa barasu kere wo dɔ ɔ. <sup>17</sup> Ama, sɔnɔ bo i la alecira n bo i fite Nyeme dɔ n la ka, i woowa ti casi. Bo i tɔ su n la ka, i koro tanalaifie, na i la wo benle, na i de fɔtu, na i si aɲunfɔ agaya, na i yo sakpa beberebe, na i la má tantambunu, na i kaaki la má burukɔnu. <sup>18</sup> Tanalaiefɔm bo bu yo tanalaifie juma ni, bu nkato n la sam bo bu kɔ atin su Nyeme dɔ n wɔ.

**4**

*Fɔtu fa kɔ kabo ya da ya ŋu asienɔgu fa ma*



*Nyeme ni*

<sup>1</sup> Nzu ti ma am di aluwa, na am suse akuruwa am nju nu a? I fite ka am sunsunni ti tie, fa ko am ahorembaa koroowa beberebe n bo i wo am nuniembaa nu, na i kpie am daafiri n dee ti a, ma so? <sup>2</sup> Am koro deke nbem, na am nya ma bu n ti, ye am koro ka am kun am bengum n a. Am konviki wura minem nenje nu, na am nya ma i n ti, ye am se akuruwam, na am di aluwa n a. Am sere ma Nyeme n dee ti, ye am nya ma am koroowa n a. <sup>3</sup> Deke bo i ti na am sere Nyeme na am nya ma i n la ka, am sere ni sunsunni tie wo. Am sere dekem ka am fa yo am kunnu koroowa a.

<sup>4</sup> Ambere bo am su ma Nyeme ni, am si ma ka sono kere bo i koro durunya n nu nenjem agaya, ti Nyeme kpof o, nzen se? Nyini ti, sono bo i fa i ahorembaa se durunya n nu nenjem su, i mi ti Nyeme kpof o lee. <sup>5</sup> Ma am sunsun ka deke bo ba kere i Nyeme Jore Kadasi n nu n ti ngbeen wo, ka, "Sono kere bo i fa i awiewie n bo Nyeme afa ama i n suuri deke be sin Nyeme nu, Nyeme si i kore agaya." <sup>6</sup> Ama, ahorma n bo Nyeme afa ama ya n sunnu. Nyini ti, ye ba kere i Nyeme Jore Kadasi n nu ka,

"Nyeme kete kpirikorofom wo,

ama, na i fa i ahorma n ma tarakam."

<sup>7</sup> Nyini ti, am fa am nu ma Nyeme. Am kete Sitana, na i nmati yaki am. <sup>8</sup> Am cin dodo Nyeme, na i gusu cin dodo am. Ambere satieyofom, am yi am saa fite satie nu. Ambere anoo nnyo nnyofom, am yo am ahorembaa casi.

<sup>9</sup> Am satie dee ti, am ma am ahore saaki, na am sun. Am fa am siri fa kaaki sun, na am fa am

ahorejo fa kaaki ahoresaaki. <sup>10</sup> Am da am ηu asiηngu ma Nyeme, na yiri bá wura am kpiri.

*Fotu fa kɔ kabo má ya jaraki ya benɔum ni*

<sup>11</sup> M ninbaam, má am jɔjɔ tie ma am benɔu. Wɔɔ bo a jɔjɔ tie ma u lamɔkɔ, wara a jaraki i, a jɔjɔ tie afa akɔ Nyeme nɔaniε kpamaawa n su ajaraki i lεε. Nzen a nya yoori sɔ, a nya ti má sɔnɔ bo i de Nyeme nɔaniε kpamaawa n lεε, ama, a yo u ηu ka jɔredifo lεε. <sup>12</sup> Nyeme ηgumi ti i nɔaniε n kpamafo a, na yiri ηgumi kaaki ti i jɔredifo a, yiri bo i koro de minem tii ji na i kaaki koro ma bu ka ηgbεen ni. Wɔɔ la ηma na a jaraki u benɔu a?

*Fotu fa kɔ yanfoya atin su*

<sup>13</sup> Am ti fen, ambere bo am se ka, “Nyuma, wara ahunma, ya kó ahin mie n su, na ya kó yo afo kun dɔ, na ya yó juma, na ya nyá ηwaa beberebe ni.” <sup>14</sup> Ambere, haari am si má sa bo i bá yo am ahunma mmɔɔ. Am ni am ηgɔɔ ti ka sε? Am ti ka bɔre wɔ, bo i tɔ na i cε má, na wie ba tie, a ηu ka wɔ kpɔnkpɔn ni. <sup>15</sup> Deke bo i ti ye ni ka am se n la ka, “Nzen Nyeme diiri su, ya wó bere, na ya yó ahin ni ahin.” <sup>16</sup> Ama, kabo i ti ni, ambere koro kpiri wɔ, na am sufɔ. Nyini yanfoya sɔ n kere ti má kpa. <sup>17</sup> Tɔ, nyini ti, sɔnɔ kere bo i si sakpa bo i yo i, na i yo má i, i mi yo satie wɔ lεε.

## 5

*Fotu fa kɔ nenɔefɔm dɔ*

<sup>1</sup> Ambere nengefom, am ti fen. Sa ngbeɛn-  
 ngbeɛnm bo bu bá tu am n dɛɛ ti, am sun na am  
 subo awie. <sup>2</sup> Am ajeke n kere susaaki, na nvɔrem  
 sumuka am suturam n kere. <sup>3</sup> Am sika ni am jete  
 kere suwura ngambulaari, na bu ngambulaari  
 wuraawa ni bá ma Nyeme jaraki am, na i káaki  
 ba yara am ka sin, am nuniɛmbaa nu. Am atien  
 ajeke nɔɔ afa ase fa kɔ durunya n awieeri wɔ lɛɛ.  
<sup>4</sup> Sasu bekun, am akete ka am tɔ má jumayofom  
 nkato, bere bo bu tambu am fiesu nenje mbaa  
 ni. Am ti kabo bu kan am ndie a, bu awie bo  
 n kere ato Micera Yikofɔ n sui nu. <sup>5</sup> Kabo am  
 wo durunya n nu fen ni, am adi fie, na am ayo  
 am kunnu koroowa. Am adi ayo ngbingbiri ka  
 toora dɔdɔrifom bo bu sukɔ ka bu kpie bu kɔm  
 ni. <sup>6</sup> Minem bo bu la má ngasi be ni, bere n ye  
 am ama ba di bu jɔre acin bu sui akun bu a. Bu  
 kete má am wɔ.

*Awieeri su dɛɛ fɔtu jɔrem ni*

<sup>7</sup> Nyini ti, m ninbaam, am yo sawɔre nminda  
 fa kɔ cɛɛn n bo Mibie ni bá ni. Am nie kabo  
 dɔdɔrifɔ yo sawɔre nminda, haari kabo bu fiesu  
 diire bá yo kpakpa barasu. I yo sawɔre nminda  
 kpanyini nzue kɔ tu takoku wɔ. <sup>8</sup> Am gusu yo  
 sawɔre. Am ma am ahore si, dama Mibie n ba  
 sanɔa n adodo. <sup>9</sup> M ninbaam, má am wo waraki  
 su, sukan am benɔu ndie, adena má Nyeme bá  
 di am jɔre. Am ti fen, yiri Jɔredifɔ n lɛɛ, yiri jina  
 anɔ n nu n a. <sup>10</sup> M ninbaam, am ma ya tenɔe su,  
 fa kɔ Nyeme nɔɔnie kanfom n bo bu yo jɔjɔri  
 Micera n duma n nu ni. Am su bu jaa yiiwa su,  
 kabo bu yo yoori sawɔre mindi diiri wahara ni.  
<sup>11</sup> Nahɔre, minem bo sa tu bu, na bu la mindi

kɔ ɲu i awieeri ni, bɛɛ ye ya fere bu ka terefiɛ-fɔm a. Am tiiri kabo sɔɔ be bo bu fere i ka Yobo n yo laari mindi barasu, fa kɔ ni wahara n kɛɛ bo i yo diiri i ni. Am si kabo kasin na Micɛra n abuka i ni. Dama Micɛra n si aɲunfɔ na i la koro agaya.

<sup>12</sup> M ninbaam, jɔɛ bo i buka i kɛɛ su n la ka, má am tan deke be ndiɛ fieo. Má am se ka am tan asiɛngu, wara am tan aɲgoro. Nzen u jɔjɔwa n bu la ka ɛɛn, am se ka, “ɛɛn.” Na nzen u jɔjɔwa n bu la ka ai, am se ka, “Ai.” Adena, má Nyɛmɛ di am jɔɛ na i yo am ɲgbɛɛn.

<sup>13</sup> Nzen be wo am nu bo sa be atu i, i ti ye ni ka i mi sere Nyɛmɛ. Na nzen be wo am nu bo i ahore ajo, i ti ye ni ka i mi di jue kansi Nyɛmɛ. <sup>14</sup> Nzen be wo am nu bo i la má laifiɛ, i ti ye ni ka i mi fere Kristo jama nkpiɛnkpiɛnm na bu ba sere Nyɛmɛ ma i, na bu nunuka i ɲguin, Mibiɛ n duma n nu. <sup>15</sup> Nyini nyɛmɛsere n bo bu sere i ni yarada ni, i má tukpakifɔ n nya laifiɛ, na Mibiɛ ni má i yasu. Na nzen haari wɔ yo satie mmɔɔ, Nyɛmɛ fá i satie n ce. <sup>16</sup> Nyini dɛɛ ti, am kan am satie bo am ayo i kɛɛ am beɲgu, na am sere Nyɛmɛ ma am beɲgu, adena am nya laifiɛ. Sɔɔ bo i yo sa bo i kɔ atin su Nyɛmɛ dɔ ni, i nyɛmɛsere la faɲga, na i yo juma nahɔɛ su. <sup>17</sup> Nyɛmɛ nɔaniɛ kanfɔ n bo bu fere i ka Eliya ni, i yo tiiri adamande ka yeɛ wɔ, na wɔ sere Nyɛmɛ ni anyumboro su, ka, má nzue tɔ, na nzue n atɔ má asien n su afɔ nsan ni sara nsen. <sup>18</sup> Na wɔ kaaki asere Nyɛmɛ, ka, i ma nzue n tɔ, na wɔ tɔ, na asien n diire mbaa kɛɛ akaaki ayo.

<sup>19</sup> M ninbaam, nzen am nu kun miniiri nahɔɛ

atin ni, na am nu kun be faari i kpieeri i nyi baari  
atin n su, <sup>20</sup> i ti ye ni ka i mi n si nu ka, sɔnɔ kɛɛ  
bo i yiiri satieyofɔ fiteeri i satie atin n su, i mi de  
nyini sɔnɔ n tii fite yiwee nu, na i ma Nyeme fa  
i mi satie beberebe n fa ce i.

**ΝΥΣΜΕ ΙΟΥΕ ΚΑΔΑΣΙ**  
**The New Testament in Anufo (Chokosi)**

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022

fe36d0e6-2a60-5e15-8d1c-8bf275389598